

Liug da sentupada da generaziuns

In «mulin» sil plaz da Puntreis a Mustér

■ (anr/hh) La casa Puntreis a Mustér duei esser in liug da sentupada e tenor quella devisa ha la Ludoteca Mustér procurau leu sil plaz per ina nova attracziun. In grond «mulin» duei promover la convivenza denter giuven e vegl. L'idea da malegiar sil plaz avon la casa in mulin ei naschida la primavera e beinspert ha ella saviu vegnir realisada en entelgientscha culs responsabels da Puntreis.

Avon rodond dus meins ei il mulin allura vegnius skizaus e malegiaus. Ils craps per dar il giug ein vegni colorai dils cussadents sezs en rama da lur activaziun. Quella nova purschida ei vegnida realisada tenor la devisa dalla Ludoteca Mustér e dils responsabels dalla casa: «Puntreis ei buca mo ina casa per cussadents.

Na, Puntreis ei era in liug da sentupada da cussadents e famiglias, pia differentas generaziuns.» La sonda vargada ei quei «mulin» vegnius inauguraus simbolicamein el rom d'in suentermiezdi da giugs cul team dalla ludoteca, affons e cussadent(a)s.

La casa ha offeriu in refrestg. Il mulin duei esser in simbol per in liug nua che differentas generaziuns s'entaupan. La Ludoteca Mustér sesanfla dil reminent ell'emprem'alzada dalla halla Cons gest sper la casa Puntreis. Leu han affons, giuvenils e carschi la pussevliadad d'eleger ord in grond sortiment da giugs ed auters mieds da divertiment pil passatemp.



Il «mulin» sil plaz da Puntreis ei vegnius inauguraus la sonda vargada.

MAD

Avertura atelier a Glion

■ (anr/abc) Sonda proxima, ils 9 da november arva l'artista *Sandra Palaia-Mohr* a Glion siu agen atelier. Ella Casa Grischa sper la piazza cumin 1, gest sur la stizun da Mobilias Fry, ha ella endrizzau igl atelier «Stell'Arte». Las localitads ein accessiblas senza scalas, pia era per glied cun impediments. Egl atelier dat ella cuors d'artisanadi ed art en diversas tecnicas,

cuors da schmincar per e cun affons. Palaia porscha vinavon mintgamai la gievgia ed il vendergis in atelier aviert. La pedagoga curativa e sociala diplomada porscha era malegiar assistiu per glied cun impediments corporals e mental.

All'avertura digl atelier Stell'Arte a Glion ei in e scadin envidaus sonda, ils 9 da november dallas 15.00 tochen allas 19.00.